

Aen Hoih Fatbouh Saw Moq 《Ra Gij Ndaekndaw Vwnzva Doenghgo Bouxcuengh》 Youq Nanzningz Hai

《壮族植物文化探微》新书发布会在邕举行



Bonjbauq siusik (gicej Maj Veiyungz) 12 nyied 25 hauh, Aen Hoih Fatbouh Saw Moq 《Ra Gij Ndaekndaw Vwnzva Doenghgo Bouxcuengh》 youq Nanzningz hai. Baez hoih neix caemh youq gwnzsieng lajsienq banh, gyangciengz lij guh hozdung ciemcoh soengq saw. 《Ra Gij Ndaekndaw Vwnzva Doenghgo Bouxcuengh》 youz Gvangjsih Minzcuz Dayoz goeng gyaousou、bozswswngd daujswh Mungz Yenzau raiz, Gvangjsih Minzcuz Cuzbanjse 10 nyied okbanj. Bonj saw neix dingh ndei gij mingz Vahcuengh、Vahgun、Yinghyij、Lahdingh Yozmingz 600 lai cungj doenghgo ranghdieg Bouxcuengh. Ndawdoz dwg gyangciengz fatbouh saw moq.

Fungsanh Yen Siujhagseng Doxdax Dangciengz Aeu Sawcuengh Raiz Cozvwnz

凤山县举办小学生现场壮文作文比赛

12 nyied 24 hauh, Fungsanh Yen youq Fungsanh Yen Daihgeih Siujyoz guh hozdung dangciengz doxdax aeu Sawcuengh raiz cozvwnz. Ndw yienh gungh miz 16 boub siujhagseng daj 4 aen yozyau hwnj dangz son Sawgun Sawcuengh haenx daengz dangciengz doxdax aeu Sawcuengh raiz cozvwnz. Ndwdoz dwg gyoengq hagseng cingq nyaengq doxdax raiz cozvwnz Sawcuengh. (Veiz Vazcunz/韦华纯 Hoz Yungj-cang/何永壮)



Sanhgyangh:

Vunzlai Caemh Ciengq Go Fazci

三江：全民共唱法治歌

12 nyied 22 hauh, Sanhgyangh Duncuz Swciyen banh aen vwnzyi vanjvei "vunzlai caemh ciengq go fazci Mbanjdung angqyangz coux Bidung", gyoengqde guh lai aen cezmu, boudaengz ciengq Golaux Duncuz、Go Bizbaz Duncuz、ciengq go diuq foux、yienj siujbinj vanzlij doxdax han vwndiz ndaej ciengj daengj, lwnh vunzlai rox gij cihsiz gimq doeg、fanj yaeuh daengj.

(Gungh Bujgangh/龚普康)

Gojgaeq Dinj Minzcuz Doxgiet Baenaj Laeng Gvangjsih

广西民族团结进步小故事

Coengh Gvangjsih Loh Gyae Gyaez Henzguck Cingz Noengz(Gwnz)

千里援桂路 浓浓边疆情(上)

20 sigij 50 nienzdaish duenh laeng, Dangj-cunghyangh gietdingh gyarengz hawj hawsingz henzhaij haeujcoengh dieg henzguck guh gensez, Sanghaij daengj hawsingz henzhaij han riengz Dangj-cunghyangh ciuheuh haeujcoengh Gvangjsih, ndatcingz coengh Gvangjsih fatmaj gunghyez, haeujcoengh gensez dieg siujsoq minzcuz

henzguck. Gonqlaeng miz 26 aen Sanghaij giyez caeuq cizgungh、vunzranz cizgungh caemh buen daeuj Gvangjsih Nanzningz、Liujcouh、Gveilinz、Vuzcouh daengj dieg youq roengzdaeu. 26 aen Sanghaij giyez coengh henzguck neix hamj gvaq cien leix gyae buen daengz Gvangjsih, lumj baenz naed baenz naed ceh, doek youq

ranghdieg bienhenz 4 aen hawsingz daeuz Gvangjsih, doek youq ndaw gunghyezyenz fatmaj doeklaeng Gvangjsih, doed rag、hai va、baenz aen, maj baenz faexhung. Miz mbanj Sanghaij giyez coengh henzguck de baenz giyez daeuz Gvangjsih, baenz gij giyez mizmingz Gvangjsih. Lumj Gveilinz Ciyoz Cangj dangseiz baenz aen giyez ceiq daeuz Gvangjsih, 1995 nienz ndaej bingz baenz giyez ngeih loih hungdaeuz guekgya, roengz giek maenhsaed hawj canjnieb yw ciuhneix laeng Gveilinz ndaej fatmaj. (Gvangjsih Minzcuz Yenzgiu Cunghsinh hawj gauj)